

Cingz Lienh Sam Nyied Sam

□ Guj Gyah Lij Hinghlinz / 古佳 李兴林

Sai:
Sam nyied daengz lo gim,
Cosam daengz lo nuengx,
Gag youq sim gag luenh,
Yaek dajsuenq yienghlawz?

Mbwk:
Daengz sam nyied cosam,
Ranzranz bae sauqmoh,
Gou lij youq ranz boh,
Mbouj rox gvaq gizlawz.

Sai:
Ngeih sam nyied mbawraeu,
Yaek aeu gen mbouj raez,
Ngiengxyaeuj iet hozsae,
Bae aeu lau vunz hah.

Mbwk:
Ngeih sam nyied mbawraeu,
Mbouj aeu de couh geq,
Gou lij youq ranz meh,
Mbouj rox deq bouxlawz.

Sai:
Daengz ndwen ngeih ngeihcaet,
Daengx vunz daet mbawraeu,
Gou muengh nuengx ngaungaeu,
Seizlawz daeuj guhdoi.

Mbwk:
Daengz sam nyied cosam,
Ranzranz guh haeuxnaengj,



Raen baz mwngz swiq caengq,
Gou naengh mbouj siengj hwnq.

Sai:
Daengz sam nyied cosam,
Ranzranz guh haeuxnaengj,
Meh gou bae swiq caengq,
Daengj(caj) nuengx daeuj hai feiz.

Mbwk:
Yawj mbawraeu dwg da,
Yawj vafonq dwg ei,
Song raeuz miz cingzngaih,
Seiqgeiq naengj haeuxcid.

Sai:
Mbawraeu naengj haeux ndaem,
Mbaw gyaemq naengj haeux gyaemq,
Song raeuz vunz doengz saemq,
Boux naemj boux couh baenz.

Mbwk:
Mbawraeu naengj haeux fonx,
Vafonq naengj haeux henj,
Song raeuz vunz doengz nienz,
Boux niemh boux cij baenz.

Sai:
Sam nyied bak va hai,

Vunzlai bouxboux maez,
Vah nuengx baenzlai ndei,
Dwk gou fizriegrieg.

Mbwk:
Sam nyied gogo maj,
Va sien dujduj hai,
Lau beix dawz sim lai,
Aiq bae mbaet duj wnq.

Sai:
Sam nyied cosam daengz,
Guh haeuxnaengj haj saek,
Gyaez nuengx cingz gaenq laeg,
Vaiq daeuj daet mbawraeu.

Mbwk:
Rumz raeuj daengz vivaek,
Sim saet lumj mbaj mbin,
Gou dwg vunz naekcingz,
Laemxsim caj beix aeu.

Sai:
Ndwn laj goek goraeu,
Song raeuz youq boux mbiengj,
Faex raeu mwn lumj liengj,
Caen mbouj siengj doxbyag.

Mbwk:
Youq laj goek faex laux,
Baedauq mbouj lumz cingz,
Coenz gangj song baez cim,
Ndawsim naek cingzngaih.

Doxgiet Goengrengz Daih

□ Cinz Genmouz / 覃建谋

Bouxcuengh swcigih,
Gizgiz cingq ngamqseiz,
Mbanjcuengh fazcanj ndei,
Lumj ndaej naengh feihgih.

Lumj rim mbwn ndaundeiq,
Yienghyiengh raeuz caez miz,
Bouxcuengh swcigih,
Gizgiz dwg diegsien.

Minzcuz doxgiet ndei,

Saedceij raeuj lumj feiz,
Ranzcuengh fazcanj ndei,
Lumj ndaej naengh feihgih.

Minzcuz ndaej doxgiet,
Daegbied raeuz guekgya,
Lumj gyoengq rwi mbaet va,
Caez dawz ma caux dangz.

Gyoengq sien caez gvaq haij,
Mbouj daengz byai mbouj yiet,

Minzcuz ndaej doxgiet,
Daegbied raeuz guekgya.

Doxgiet goengrengz daih,
Feizhaij hix gamj gvaq,
Lumj gyoengq rwi mbaet va,
Caez dawz ma guh dangz.

Seizneix Cungguek raeuz,
Gij raeuj gvaq daengngoenz,
Cibseiq ik bouxvunz,
Sing riu mbwn yaek lak.

Vih saedyienh maqmuengh,
Hwnzngoenz riengz dangj caeuz
(byaij),
Seizneix Cungguek raeuz,

Gij raeuj gvaq daengngoenz.

Minzcuz daih doxgiet,
Dawz diet lienh baenz gim,
Cibseiq ik bouxvunz,
Sing riu mbwn yaek lak.

Hajroek duj vamoq,
Caez doengz go caemh ngeiq,
Minzcuz doxgiet ndei,
Caux guh seizdaih moq.

Gyaq giuz gvaq feizhaij,
Doengzsim hai gvangq loh,
Hajroek duj vamoq,
Caez doengz go caemh ngeiq.
(caengz sat)

“Deng a! —Deng a! Itdingh aeu coux guh yah, itdingh aeu coux guh yah!” Buzsimjsam doq riu doq ngaekgyaeuj dwddwd, riengz gij vah Lungz Byauh gangj.

“Lwg, mwngz baenzlawz yiengh-neix gangj a?” Daxmeh de bwnda nyaeuq dwk muengh coh daeglwg bonjfaenh, “dang’yienz aeu cingj Buzsimjsam mwngz caenhrengz bae gangj vah ndei, hoeng yienzfaenh dwg seiqgonq dingh, caiq gangj sawmingh Siu Cuh caeuq mwngz mbouj hab geijlai ne……”

“Meh! Haenx dwg canghsuenq-mingh yaek yaeh vunz aeu ngaenz luenh gangj ndwi——”

“Baenzlawz ndaej yienghneix gangj ne?” Daxmeh de hozhwnj lo, “mwngz dwg yied hung yied mbouj

roxsoq lo.”

“Mbouj youqgaenj.” Buzsimjsam doq bang gangj vah, de ndwn hwnjdaeuj bek aek naeuz, “gij saeh neix Simjsam itdingh bang mwngz, haha……”

“Dwg ha, caez baengh mwngz lo.” Daxmeh Lungz Byauh biengj hwnj vengqbuh, daj ndaw daehbuh mbon ok geij mbaw ngaenz daeuj, oet haeuj ndaw fwngz Buzsimjsam, song boux doi rag dwk byaij ok dou bae.

· Sawcuenhraez Lwgnyez ·

Gij Golwgnyez Henz Dahhoengz

□ Lanz Haijyangz Moz Beibei / 蓝海洋 莫蓓蓓

Lungz Byauh muengh coh gij ngaeuz song bouxlaux, simnyap danq gaemz hei q ndeu, aeu fwngz vad deuz song duz nengznyaen mbin youq henz cim gij baksieng gwnz ga de.

Ngoenz doek ngoenz gvaqbae lo, baez yaep da couh yaek daengz ndwenbet cibngux lo, hoeng Buzsimjsam mbouj daiq ndaej maz siusik ndei daeuj, byawz naeuz ronghndwen yaek luenz vunz hix ndaej angq? Daj Buzsimjsam gangj vah wzwazaz

caemhcai q cang riu yawj ndaej ok, gij saeh ai q mbouj dai q swnh. Mehmoiz ganvad neix, hix mbouj rox yaek loengh daengz seizlawz, moix gek cibgeij ngeihcib ngoenz yienghneix, couh daeuj ranz Lungz Byauh baez he, gwq gangj di vah mbouj in mbouj humz, cungj mbouj hawj vah dingh. Hoeng moix baez cungj aeu gwn donq ndeu roxnaeuz daiq di doxgai q ndeu, cai q aeu di cien z dem cij deuz.

(caengz sat)